

嘉業堂
叢書

尚書正義

第五册

尚書正義卷第九

國子祭酒上護軍曲阜縣開國子臣孔穎達奉敕撰

商書

盤庚上第九

盤庚中第十

盤庚下第十一

說命中第十二

說命中第十三

說命下第十四

高宗彤日第十五

西伯戡黎第十六

微子第十七

盤庚上第九

盤庚至三篇

正義曰商自成湯以來屢遷都邑仲丁河亶甲祖乙皆有言誥。歷載於篇。盤庚最在其後。故序總之。自湯至盤庚凡五遷都。今盤庚將欲遷居而治於亳之殷地。民皆戀其故居。不欲移徙。咨嗟憂愁。相與怨上。盤庚以言辭誥之。史敘其事。作盤庚三篇傳。自湯至亳殷。

正義曰經言不常厥邑。于今五邦。故序言盤庚五遷傳。嫌一身五遷。故辯之云。自湯至盤庚凡五遷都也。上文

言自契至于成湯八遷并數湯爲八此言盤庚五遷又并數湯爲五湯一人再數故班固云殷人屢遷前八後五其實正十二也此序云盤庚將治亳殷下傳云殷亳之別名則亳殷卽是一都湯遷還從先王居也汲冢古文云盤庚自奄遷于殷殷在鄴南三十里束皙云尙書序盤庚五遷將治亳殷舊說以爲居亳亳殷在河南孔子壁中尙書云將始宅殷是與古文不同也漢書項羽傳云洹水南殷墟上今安陽西有殷束皙以殷在河北與亳異也然孔子壁內之書安國先得其本此將治亳殷不可作將始宅殷亳字摩滅容或爲宅壁內之書安國先得始皆作亂其字與始不類無緣誤作始字知束

哲不見壁內之書妄爲說耳若洹水之南有殷墟或當
餘王居之非盤庚也盤庚治於亳殷紂滅在於朝歌則
盤庚以後遷於河北蓋盤庚後王有從河南亳地遷於
洹水之南後又遷于朝歌

傳胥相至怨上

正義曰釋詁云胥皆也相亦是皆義故通訓胥爲相也
民不欲徙乃咨嗟憂愁相與怨上經云民不適有居是
怨上之事也仲丁祖乙亦是遷都序無民怨之言此獨
有怨者盤庚祖乙之曾孫也祖乙遷都於此至今多歷
年世民居已久戀舊情深前王三徙詁令則行曉喻之
易故無此言此則民怨之深故序獨有此事彼各一篇

而此獨三篇者謂民怨上故勸誘之難也民不欲遷而盤庚必遷者鄭玄云祖乙居耿後奢侈踰禮土地迫近山川營圮焉至陽甲立盤庚爲之臣乃謀徙居湯舊都又序注云民居耿久奢侈淫成俗故不樂徙王肅云自祖乙五世至盤庚元兄陽甲宮室奢侈下民邑居墊隘水泉瀉鹵不可以行政化故徙都於殷皇甫謐云耿在河北迫近山川自祖辛以來民皆奢侈故盤庚遷於殷此三者之說皆言奢侈鄭玄旣言君奢又言民奢王肅專謂君奢皇甫謐專謂民奢言君奢者以天子宮室奢侈侵奪下民言民奢者以豪民室宇過度逼迫貧乏皆爲細民弱劣無所容居欲遷都改制以寬之富民戀舊故

違上意不欲遷也案檢孔傳無奢侈之語惟下篇云今我民用蕩析離居罔有定極傳云水泉沈溺故蕩析離居無安定之極徙以爲之極孔意蓋以地勢滂下又久居水變水泉瀉鹵不可行化故欲遷都不必爲奢侈也此以君名名篇必是爲君時事而鄭玄以爲上篇是盤庚爲臣時事何得專輒謬妄也

盤庚

正義曰此三篇皆以民不樂遷開解民意告以不遷之害遷都之善也中上二篇未遷時事下篇旣遷後事上篇人皆怨上初啟民心故其辭尤切中篇民已少悟故其辭稍緩下篇民旣從遷故辭復益緩哀十一年左傳

此篇云盤庚之誥則此篇皆誥辭也。題篇不自盤庚誥者。王肅云取其徙而立功故。但以盤庚名篇。然仲丁祖乙河亶甲等皆以王名名篇。則是史意異耳。未必見他義。

傳殷質以名篇

正義曰。周書謚法。成王時作。故桓六年左傳云。周人以諱事神。殷時質未諱。君名故以王名名篇也。上仲丁祖乙亦是王名。於此始作傳者。以上篇經亡。此經稱盤庚。故就此解之。史記殷本紀云。盤庚崩。弟小辛立。殷復衰。百姓思盤庚。乃作盤庚三篇。與此序違非也。鄭玄云。盤庚湯十世孫。祖乙之曾孫。以五遷繼湯。篇次祖乙故繼。

之于上累之祖乙爲湯玄孫七世也又加祖乙復其祖
父通盤庚故十世本紀云祖乙崩子祖辛立崩子開甲
立崩弟祖丁立崩開甲之子南庚立崩祖丁子陽甲立
崩弟盤庚立是祖乙生祖辛祖辛生祖丁祖丁生盤庚
故爲曾孫

盤庚至四方

正義曰盤庚欲遷於亳之殷地其民不欲適彼殷地別
有邑居莫不憂愁相與怨上盤庚率領和諧其眾憂之
人出正直之言以曉告曰我先王初居此者從舊都來
於是宅於此地所以遷於此者爲重我民無欲盡殺故
先王以久居墊隘不遷則死見下民不能相匡正以生

故謀而來徙以徙爲善未敢專決又考卜於龜以徙旣
獲吉兆乃曰其如我所行欲徙之吉先王成湯以來凡
有所服行敬順天命如此尙不常安可徙則徙不常其
邑於今五邦矣今若不承於古徙以避害則是無知天
將斷絕汝命矣天將絕命尙不能知況曰其能從先王
之基業乎今我往遷都更求昌盛若顛仆之木有用生
槩哉人衰更求盛猶木死生槩哉我今遷向新都上天
其必長我殷之王命於此新邑繼復先王之大業致行
其道以安四方之人我徙欲如此耳汝等何以不願徙
乎前云若不徙以避害則天將絕汝命謂絕臣民之命
明亦絕我殷王之命復云若遷往新都天其長我殷之

王命明亦長臣民之命互文也

傳亳之別名

正義曰此序先亳後殷亳是大名殷是亳內之別名鄭
玄云商家自徙此而號曰殷鄭以前未有殷名也中
篇云殷降大虐將遷於殷先正其號明知於此號爲殷
也雖兼號爲殷而商名不改或稱商或稱殷又有兼稱
殷商商頌云商邑翼翼撻彼殷武是單稱之也又大雅
云殷商之旅咨汝殷商是兼稱之也亳是殷地大名故
殷社謂之亳社其亳鄭玄以爲偃師皇甫謐以爲梁國
穀熟縣或云濟陰亳縣說旣不同未知誰是

傳適之至邑居

正義曰釋詁云適之往也俱訓爲往故適得爲之不欲往彼殷地別有新邑居也

傳籲和至之言

正義曰籲卽裕也是寬意故爲和也憂則不和戚訓憂也故率 and 眾憂之人出正直之言詩云其直如矢故以矢言爲正直之言

傳我王至於此

正義曰孔以祖乙圮於相地遷都於耿今盤庚自耿遷于殷以我王爲祖乙此謂耿也

傳劉殺至殺故

正義曰劉殺釋詁文水泉鹹鹵不可行化王化不行殺

民之道先王所以去彼遷此者重我民無欲盡殺故也
傳言民至所行

正義曰不徙所以不能相匡以生者謂水泉沈溺人民
困苦不能從教相匡正以生又考卜於龜以徙周禮太
卜大遷則貞龜是遷必卜也

傳先王至輒遷

正義曰下云于今五邦自湯以來數之則此言先王總
謂成湯至祖乙也先王有所服行謂行有典法言能敬
順天命卽是有所服行也盤庚言先王敬順天命如此
尙不常安有可遷輒遷況我不能敬順天命不遷民必
死矣故不可不遷也

傳湯遷至國都

正義曰孔以盤庚意在必遷故通數我往居亳爲五邦鄭王皆云湯自商徙亳數商亳囂相耿爲五計湯既遷亳始建王業此言先王遷都不得遠數居亳之前充此數也

傳言今至槃哉

正義曰釋詁云枿餘也李巡曰枿槁木之餘也郭璞云晉衛之間曰枿是言木死顛仆其根更生槃哉此都毀壞若枯死之木若棄去毀壞之邑更得昌盛猶顛仆枯死之木用生槃哉

盤庚至攸箴

正義曰前既略言遷意今復並戒臣民盤庚先教於民云汝等當用汝在位之命用舊常故事正其法度欲令民徙從其臣言也民從上命卽是常事法度也又戒臣曰汝等無有敢伏絕小人之所欲箴規上者

傳敷教至朝臣

正義曰文王世子云小樂正敷干太胥贊之籥師敷戈籥師丞贊之彼並是教舞干戈知敷爲教也小民等患水泉沈溺欲箴規上而徙汝臣下勿抑塞伏絕之鄭玄云奢侈之俗小民咸苦之欲言於王今將屬民而詢焉故敕以無伏之傳眾羣臣以下

正義曰周禮小司寇掌外朝之政以致萬民而詢焉一曰詢國危二曰詢國遷三曰詢立君是國將大遷必詢及於萬民故知眾悉至王庭是羣臣以下謂及下民也民不欲徙由臣不助王勸民故已下多是責臣之辭傳先王

正義曰此篇所言先王其文無指斥者皆謂成湯已來諸賢王也下言神后高后者指謂湯耳下篇言古我先王適于山者乃謂遷都之王仲丁祖乙之等也此言先王謂先世賢王此旣言先王下句王播告之王用不欽蒙上之先不言先省文也

傳王布至其指

正義曰上句言先王用舊人共政下云王播告之修當謂告臣耳傳言布告人者以下云民用不變是必告臣亦又告民

傳聒聒至何謂

正義云鄭立云聒讀如聒耳之聒聒聒難告之貌王肅云聒聒善自用之意也此傳以聒聒爲無知之貌以聒聒是多言亂人之意也起信險膚者言發起所行專信此險僞膚受淺近之言信此浮言妄有爭訟我不知汝所訟言何謂言無理也

非予至觀火

正義曰言先王敬其教民用大變我命教汝汝不肯徙